

容齋文鈔

余少時讀左傳國語國策諸書好之而苦
未能淡解稍長讀史記唐宋八家文復好
之而緣治舉子業未遑研究弱冠後以家
事棄去帖括專肆力於詩古文辭因得博
覽秦漢六朝以及元明 本朝之文浩如
江海雖略窺涯涘而偶涉筆仿為之輒弗
工遂欲謝去又以性嗜韻語凡與二三耆
宿講求而切劘之者亦惟詩是務於文則
間及焉耳然牽率酬應不能盡却祝嘏諛
墓時復有作歲月既悠所積益多而好我

者亦謬為許可因抄存八卷嗟乎自田夫
西郊兩先生歿吾邑之能為古文者亦幾
渺乎無人矣是在後來有志之士好學虛
懷矩矱前賢參稽哲匠深造自得慎毋不
知而作欺人自欺以遺笑於識者斯可矣
至於余文本不能自信縱有微長亦只於
無佛處稱尊耳固未敢與當世之能為古
文者絜短長也遑論古人哉噫斯可愧已
嘉慶己未長夏漫更如綸常書於言息廬
時年六十有六

容全文鈔目錄

卷一

序九

卷二

序七

卷三

墓誌銘七

卷四

墓誌銘七

卷五

墓表 二

行狀 二

卷六

傳 三

記 三

卷七

祭文 四

跋 十五

銘 六

贊 三

卷八

尺牘 四十一

容叅文鈔卷一

綸上茹綸常文靜

序一

呂寸田詩集序

中州詩學近代自何李登壇雄視海內迄今三百年來俊哲挺生後先輩望固非僅梁園風雅雪園文社諸人得而盡之然其最顯且久莫如新安呂氏蓋自忠節公肇其端司農公振其緒厥後子姓繁衍著述如林其爲予所及見者如夢月巖青要山房力園松坪栢巖諸集皆卓然度越恒流無愧

於古作者予友寸田先生爲司農公孫松坪方伯
之子家世通顯高才博學視友朋爲性命其爲詩
不名一家蒼茫奮發落筆千言輒不能自休而原
本忠孝氣厚詞雄情真語樸率以子美爲歸乾隆
丙申間與予訂交綿上用詩篇相角逐樽酒論文
晁晁不倦自漢魏六朝唐之初盛中晚以及宋元
明人無不洞悉微旨間嘗語余曰詩猶兵也兵貴
精而不貴多曹瞞苻堅之敗皆以百萬彼淮陰之
多多益善直英雄欺人語耳況藏之名山懸諸國
門是豈可鹵莽從事乎吾輩詩卷他日倘出而問

世寧少無多寧使人恨其少勿使人厭其多如明
之徐廸功高燕門與弇州明卿伯玉諸君子非其
較然者歟予心慙之然拙集付剞劂時依違遷就
卒不能用其語已酉春先生之弟碩亭先生以詩
集郵寄展卷誦之愛其冲融大雅絕少汎濫酌應
之作予爽然曰是殆真能用寸田之語者耶旣而
寸田札至言其小阮爲通州刺史者將爲梓其詩
詩盈千首當汰其半仍述斯旨屬予爲序且並以
袁子才太史之序視予予以爲寸田之詩之深究
本源窮極體要古今兼擅太史言之詳矣予無以

異也惟述其昔日相易之旨以見其持擇之嚴實能自用其語而詩之足以信今傳後無疑矣於戲出予之中下駟以當寸田之上駟有不瞠焉其後者乎顧猶不辭固陋而爲之序者夫亦以志予愧也

定陽張氏族譜序

代

昔者先王之以親睦教天下也大宗小宗之法特詳自世爵世祿之制廢而宗法亡宗法亡而敬宗收族之道不行隋唐以來崔盧李鄭號爲右族然祇取地望以相誇詡則所謂專門圖譜之學亦具

文焉耳迄於近代並譜牒無存世系弗講大家巨
室往往不能詳其所自出又安問閭閻閭閻之子
哉於戲親親之誼薄而鬪墻者或夷本支於行路
尊祖之義乖而附勢者或聯異派爲同宗吾族系
出自黃帝第五子厥後所在繁衍視他姓爲勝如
仲之孝友儀之遊說良之佐漢昭之輔吳綱之埋
輪華之博物東之九齡之相業橫渠南軒之理學
釋之之爲廷尉博望之使月氏道陵之仙睢陽之
烈公藝之同居九成之直諫桓侯爲蜀之虎臣右
侯爲石之謀主以暨安世三飡平子二京藉祐詩

名旭芝書法此其最著者矣其他散見史冊知名
於世者尤指不勝屈也第代遠時湮無可考據不
敢妄有攀附自先世祖順由隴西遷汾之介休至
今九世迄未有譜辛丑歲堂兄煥始慨然欲修輯
之命燮參訂時燮適出守鞏昌星輅就道旣而調
蘭州攝監司事公務焦勞羽書旁午未遑竣事迨
乙巳旋里後始克成此譜嚴支派以續先緒載
封典以重國恩錄誌銘傳表以著行實而示後
世後之子若孫讀斯譜者尙思克繩祖武以母隕
墜家聲是則燮之厚望也夫

硯農印譜序

侯君硯農荆人季弟也少未竟學長而傾慕雅流
頗稱好事嗜書畫凡收藏家雖遠在數百里外皆
不憚車馬造訪而臨池自運尤以青主先生爲宗
法其所謂得山堂者蓋亦以爲得傅之秘云乃比
年復有印章癖遇有佳石多方購求必得之而後
快偶失則懊嘆屢日以故所蓄甚夥而獨苦無鐫
刻如三橋雪漁其人者近得艾城李君道畱工斯
技遂延之家閭歲月始粗竣於是品其色澤差其
低昂或襲以團窠之錦或函以灑沙之檀光怪陸

離稱巨觀焉而又恐其久而散失彙爲印譜間以
視余乞一言以誌其梗槩余笑曰君家不中貲而
爲此不急之務重有所損拮据以之其奈之何君
應之曰古之人以癖稱者亦多矣如杜預之左癖
王濟之馬癖右軍之鸞癖阮孚之屐癖元章之石
癖以至和嶠之錢癖則其下焉者矣且世之以博
塞狹邪破其家者比比也吾之所爲不差勝乎余
唯唯無以難也爰不辭而爲之序

如蘭集後序

惟園刺史歿於丁酉越廿有一載戊午有以刺史

所錄如蘭集板片售者謂存貯於某村某蘭若余聞之驚嘆使兒輩往視之歸而告余曰矮屋荒涼上漏下濕不庇風雨半污泥土中缺佚者已數十頁矣使不早爲掇拾其不析而爲爨薪漬而爲朽木者幾何於是亟傾貲購之不足則更謀之友人閻君潔甫閻固尚義留意風雅樂爲之助遂捆載歸屬李子亨占閻子升三春閣之便補刻之都門而是集得復完嗟乎當刺史在日簪組名場笙歌茂苑里開北海之樽遊接南皮之讌抗懷千古著述等身其如蘭集二十卷則皆名卿大夫騷人詞

客與之敦應求通縞紵者也交遊之廣意氣之豪
抑何盛耶及其既歿僅廿餘年而子姓凋零田園
廢斥鄴架典墳米船書畫悉蕩而爲冷烟飄風之
不可問甚至並其生平詩文之板片皆不能保而
有之抑何衰耶夫人人事推遷否泰互乘固其理也
而獨奈何如此其速且甚耶余於刺史桑梓後進
辱爲忘年交文酒之會每預其末卽事感懷俯仰
今昔能不爲之泣下沾襟哉是集也他日傳之藝
林刺史之名藉以不朽庶可瞑目於九京也已而
於吾鄉文獻之徵或亦不無小補云

南村別墅雜咏序

南村別墅雜咏二卷向爲楊官山別駕所選曉園主人將付之梓乃復屬余論定之且乞弁言余視官山去取頗嚴而曉園持論稍寬欲多存之以酬諸友惠好之意余未免曉園是徇然諸君偶爾興到留題不暇點定間有未當輒妄易一二以當忠告他日諸君見之幸無深訝也餘見諸題咏中茲不更贅云

邑侯呂蘭浦壽序

余嘗攷古右姓如太原之王榮陽之鄭范陽之盧

清河博陵之崔隴西趙郡之李未始不嘆其胚胎
前光垂耀史冊爲甚盛也 國朝定鼎以來深仁
厚澤久道化成世家巨閥所在不乏而中州文獻
必首推新安呂氏自太傅忠節公而下以忠孝節
義文章政事表見於當世者指不勝屈以視夫七
葉之中人人有集侈爲美談者不啻過之矣而就
中若司農公若方伯公皆曾仕於吾晉者甘棠遺
愛迄今父老猶傳頌之不衰而何幸數十年後復
得我邑侯蘭浦先生侯以司農公孫方伯公猶子
登進士科 天子卽委以民社爲臨縣令旣而署

陽曲遂調介休介故劇邑差務殷繁訟牘叢積宰
斯地者亦綦難矣而侯則不事苛察不尚嚴厲政
理優游事皆修舉汰里下之役除驛館之需水旱
爲災並捐重貲賑恤之蓋侯之治行循良宅心慈
愛率此類也至於振興文教課率書院生徒捐置
束修膏火之費於臨於陽曲皆然而介爲久且備
暇則與邑中士大夫歌幽飲射興仁講讓問探綿
山孤岐勝水諸勝溯有道之遺蹤訪介推之故里
賦爲詩歌勒珉以垂不朽倘所謂能以經術飾吏
治者歟已亥孟冬四日爲侯初度之辰奉大憲檄

將往視西河別駕篆介之人士相與咨嗟思慕之
不置咸謀爲壽而屬言於余余學植荒落安能爲
侯壽然竊聞之侯內行純備與諸昆弟友愛無間
置祭田設家塾凡族黨中貧乏者恒周給之不倦
事刺史公稱至孝幼隨宦楚南廿餘載見聞博洽
濡染庭訓以故施之於政有古循吏風其德溥其
志裕其氣度淵冲固壽之理也他日紹司農方伯
之緒而益衍忠節公之家聲寧有既乎福祿壽考
直操券得之耳詩曰樂只君子民之父母而又申
之曰德音不已曰遐不眉壽是可爲侯頌也已

外舅鎬軒先生七十壽序

士君子鍾天地清剛之氣進而見用於世則發於功名達於政事爲名臣爲巨儒卽其退而伏處其飭躬勵行亦必具有光明卓犖非常之槩以爲一鄉之所矜式者如外舅鎬軒先生殆其人也先生爲介右姓先世皆有聲黌序幼失怙讀書能通大義事母梁孺人以孝稱綜理家政下至綦履皆得其所識者早有以覘其器識之遠大矣長而風裁整峻言笑不苟望而知爲端人偉士乾隆遊京師以例授翰林院待詔以應得封典馳贈

父曲齋公蓋先生每有志用世而以終鮮兄弟獨力支柱門戶未能如意故歸而徜徉綿山汾水之間旗亭畫壁撥阮彈棋以消其盤礴鬱積之氣然賢豪長者並樂與敦僑札之契長吏下車亦多折節諮訪金川之役先生家僅中貲首捐千金

歲祲輸穀賑飢其慷慨好義率此類也晚歲與邑中士大夫爲耆年會雖稍近和易而少年恣縱者猶憚近之戊戌舉鄉飲大賓論者咸以爲允至其訓諸子及孫間室之內嚴若朝典尤有類於漢石奮萬石君家法焉今歲庚子季夏廿又一日爲先

生七十壽辰膏雨知時熏風入韻延齡之酒旣清
且醇獻壽之桃亦甘而碩宜老之品饒焉而先生
之子官蒙陰者以所治士庶祝嘏之詞郵寄適至
於是桑梓親知皆將旅進稱觴而先期乞常言爲
先生壽先生與先大夫爲至交常居甥館獲侍杖
履幾三十載不敢以不文辭而又不敢以世俗浮
游之說進謹約舉其居家植品之大端以爲介之
人士倡乃先生間嘗語常以家道中落爲憾常竊
以爲過矣夫家世之盛衰亦視夫子孫之賢不肖
已耳使其賢也雖貧何傷使其不肖也雖富何爲

先生之貽謀善矣迄今長君茂才而學使者旌其德行之優叔嗣少府而秉憲者列爲循良之最諸孫振振繩繩將益昌大其門詩曰豈弟君子福祿攸降又曰樂只君子遐不眉壽是可以爲先生頌已若持籌障簾擁寶自封彼橫且二足者率皆能之又何羨乎先生其可以嘽然而進一觴矣

郭畏一先生七十壽序

代

歲在柔兆閏茂菊月之六日爲吾邑郭畏一先生七十懸弧之辰邑之士大夫咸謀製錦郵書於先生之猶子官京朝者以年家子乞余文爲壽予

少先生幾三十年童稚時已習知先生之爲人性
孝友淳厚有大略重然諾輕施予凡公私事義所
當急者悉毅然任之如邑中文廟之廊其規制浮
圖之謀其肇作城工之葺其傾圯先生皆捐重貲
不避勞怨與首事諸公共襄其成而豪無德色至
於教諸子姓則時述伏波刻鵠畫虎之訓以戒之
嘗於從子中愛其最幼者曰是兒岐嶷興吾宗者
必此子凡撫育訓勉靡不備至幾等於楊惲之竹
林別室銅盤重肉也厥後果掇巍科人咸謂非先
生之力不至此其他積德累仁陰行其善更難枚

舉故交游戚屬莫不善其所爲知先生負宰世之才其異日設施必有如陳孺子所云者乃越廿餘歲予備員史館僅聞先生以例授幕府職未嘗得一日酬其壯志而茲已年屆杖國矣嗟乎士君子苟得志於時則功被生民聲施後世以盡抒其胸中之蘊不然亦如少游所謂乘下澤車御款段馬鄉里稱善人斯可矣彼夫逃名人境之外寄身山澤之間行吟憔悴苦節自甘抑何爲歟至若閉關却掃左對孺人顧弄稚子酒後耳熱仰天鳴缶則又甚已若先生者於行無所畸於人無所忤固大

異於憤時嫉俗者之所爲史稱君家有道隱不違
親貞不絕俗先生殆庶幾焉宜其康寧壽考日引
月長而未有艾與且愚聞之國家敬老則民作孝
故上庠下庠異其地饗禮食禮異其儀縞衣燕衣
異其服古者養老之典固有若是之詳且重者今
先生遭逢 盛世允爲人瑞他時將有蒲輪束帛
之徵寧但令鄉里稱善而已乎故不辭而爲之序

邑侯汪讓庭六十壽序

介休古彌牟地自秦建置郡縣以來度土居民日
增日廓遂爲劇邑迨至 國朝定鼎休養百數十

年商賈輻輳閭閻富庶尤稱盛焉第風俗由儉而奢人情由厚而薄競於利而道義罔聞驚於爭而禮讓弗講盈虛消長是賴賢有司有以深思而亟挽之也守斯土者自晉魏昌賈公明渭南史公而外非無雄駿傑出之才而求其維風易俗遺愛在人名垂不朽者或指不多屈也今 天子御極之四十八年邑侯讓庭汪公由絳州判遷介休令甫下車強豪斂跡百廢具舉苛察不事而隸胥迄不能欺有頑梗不率者亟置之法革驛傳供應之規以剔蠹移皇華駐節之所以便民建壯繆之祠嚴

書院之課以尊祀典而興文教其經營土木伙助
生徒率捐重貲無吝以故都人士皆感頌以爲難
而不知侯之所不可及與大有造於吾邑者固不
在此也其胸懷亮直則回曲之徒將自惧其敦尙
樸素則奢靡之俗將自愧其爲政忠厚和平不亟
亟爲輝赫聰覈之舉則浮薄喜事與夫宓子之所
謂陽矯者亦將徘徊自阻而不前矣余所望移風
易俗張弛而調劑之者庶幾於侯見之也詎非邑
人之厚幸哉茲丁未孟秋下浣八日爲侯六旬初
度之晨士民僉謀爲壽而屬序言於余余至謦陋

安能爲侯壽然竊聞之侯家世通顯勿隨太翁雲
村公自微遷居於常卽爲毘陵諸先達所器重嗣
侍太翁於兩浙司馬運副各任公私佐理井井有
序戊子中式順天副車凡所與遊皆賢豪長者甲
午揀發晉省爲州佐歷署孝義屯留襄陵榮河諸
縣所至有聲金川奏凱理總局差務庚子雅大中
丞委修山西通志輯要逾年 鑾輿巡幸五臺承
辦大差上游皆倚重焉旣而擢宰介邑丙午 翠
華復西幸仍辦大差卽於臺山 行在引見賞貂
皮內幣 天語嘉予一時傳以爲榮乃或者謂侯

名未登甲科官未逾七品五斗折腰齒卽遲暮抑
何才之豐而遇之蹇耶是大不然蓋侯初而濡染
庭訓壯而接跡名賢見聞博洽嗜古工書好賢禮
士有古循吏風詩曰樂只君子民之父母而又申
之曰德音不已曰遐不眉壽侯之福祿壽考自可
操券得之耳他日紹武公之懿誠膺卓茂之侯封
固未爲晚也今歲春夏之交旱暵是虞侯宿壇祈
禱旣而膏雨霑足抽青被畝轉歉爲豐金風應律
躋堂爲期商歌於市農忭於野鄉先生誦豳風七
月之章門下士獻天保九如之頌而僕亦摘下里

之詞以祝侯試閱之或可輟然而進一觴耶

容叅文鈔卷二

綿上茹綸常文靜

序二

弓觀德七十壽序

嘗觀世之庸庸者率多富壽康寧而其他豪傑之士能自樹立以表見於當世或反阨抑困塞之使不永年卽永年矣亦坎壈終身不獲發舒其才智之萬一則幾疑造化之權衡爲或爽矣然有然者有不然者有然而不盡然者如觀翁先生一人之身其盛衰否泰有可得而言者矣先生髫年失怙

卽稱家督侖儻英奇所交盡一時賢豪長者援例
得州司馬慷慨思以功名自奮旣而以兩弟皆列
武庠而季弟耀德公才望尤傑出公曰是可以大
吾門也遂一意策勵欲成弟名延師講武不吝重
貲舉凡飲食起居之細弧矢鞍馬之勞無不身親
課率歷年罔懈以視姜肱楊播之友愛殆不啻過
之故耀德公由武科起家馴致至大鎮屹然爲國
干城人謂非先生之力不至此乃先生於枹箸後
以家道中落思用計然策走四方耀德公數遣使
迎之署而數却之曰吾不以累吾弟也遊淮安燕

趙問幾二十餘載所至引重而卒不如意廢然以
返而亦已老矣又以右臂不仁養疴習靜早歲朋
酒讌會之樂車馬徵逐之豪消除殆盡亦何才之
豐德之盛而遇之蹇耶弟吾謂先生之佐弟成名
顯榮數世其光前也教子咸稟義方或隸仕籍或
雋武闈其裕後也迨耀德公陳請 賜封晉擢崇
階先生之孝友直達 天聽則先生之遇不可謂
不隆先生之福不可謂不厚而先生之壽亦將遐
陟期頤矣吾於是嘆造物於盛衰否泰之間固善
變其權衡而終莫之或爽也茲歲丁未九月 日

爲先生懸弧令旦恰當事舉先生爲鄉飲大賓人咸以爲允於是親知僉謀爲先生壽而乞序言於余余與先生皆娶於侯氏而先生之哲配爲尊行固習知先生者不敢以世俗貢諛之辭進故只序其巔末如此詩曰其德不爽壽考不忘又曰令德壽愷萬福攸同其先生之謂乎請以是爲祝嘏之頌焉

宋尹東六旬壽序

代

嘗見世之祝嘏者衍箕疇之五福頌天保之九如甚且椿齡鶴算率爲荒謬不經之談諛其操行則

幾上掩古人核其品流或止差肩庸衆無論當之
者內愧而從而爲之詞者又何言之不衷耶乃說
者謂豐功偉烈苦節畸行必須際通顯蒙患難而
後見彼安常處順終老於牖下者多無可稱述此
殆不然苟孝友能型於家庭忠信可布於閭里承
先敎後以一身支柱乎其間而使子姓卒蒙其庇
不至隕墜其家聲則其可壽者自在也如我尹東
先生廣平華胄汾水清門幼卽岐嶷自中憲公卽
世後與兄虞門君友愛無間事母姜太恭人尤稱
色養識者有郊祁之目然君性沉摯有幹略敦儉

素屏華靡而虞門君慷慨好施喜交遊寄情聲色
揮擲千金不少吝以故名賢碩彥及郡邑大夫咸
樂與之通編紵以至緇流羽士狎客纖兒里豪市
僧之徒無不欲承色笑而效奔走一時羣從聯翩
門庭煊赫稱極盛焉厥後虞門君緣索負南遊復
重有所耗鬱鬱以歸而家遂中落君處之無幾微
憾每躬親米鹽瑣屑稱家督旣而姜太恭人暨虞
門君夫婦相繼歿其他諸房亦皆漸卽凌替君內
撫孤幼外清積逋十數年來經營婚嫁亦云瘁矣
猶子長者屢歲遠遊有幼子三次者髫年玉折遺

子一君皆撫愛備至迄今讀書家塾頭角森然且有出而應童子試者矣不獨此也凡諸從兄弟之子若孫無不輔之翼之教誨之瞻恤之務使之成立而後已此宋氏之業由盛而衰由衰而再盛之機也人咸謂非君之力不至是今歲戊申上元前二日年六十矣親舊僉謀製錦爲君壽而先期寓書乞序言於余余與君世講不敢以不文辭方君之從先祭酒公遊也余年尙少未習君追先祭酒公歸葬時始克與君晨夕君偕二三門下士竭力周旋不以存歿異視至今母氏猶依君家別業以

居余薄宦羈身不遑定省賴君時相存問君之篤
行率類此余聞之邑人曰君家世少高年數歲前
君以風疾幾殆意外獲痊而壯健轉逾於昔向以
乏嗣爲憂昨秋始符熊夢鄉黨間賀者踵相接也
於戲天之報施善人於是爲不爽矣詩曰天被爾
祿景命有僕此之謂也君之福壽康寧其殆方興
而未艾歟此可以爲君壽也已

杜牧川七十壽序

晉國表裏山河鍾靈毓秀高賢碩德載在史冊固
代不乏人而隋唐以來其領袖儒林振興後學桑

梓沐其教育海內奉爲宗師則惟文中子元遺山
薛文清爲最著乃遠者千餘歲近者亦數百年流
風餘韻漸滅殆盡求師者旣尊禮之無聞而爲之
師者亦詭隨而自貶世俗日偷師道日壞此有識
者所以致慨於巫醫樂師百工之有師而士大夫
之族反有所不及也然十室之邑必有忠信遂謂
適館授餐之無其事發蒙博論之無其人是又不
然矣如吾友秀容牧川先生以名孝廉教授綿上
者卅載始設帳於高氏繼設帳於城西李氏南村
梁氏最後復館於李之弟與從子所在引重久而

稱頌弗衰及門數十人皆彬彬儒雅其雋者尤有聲黌序於是邑之人士共謂其無愧於古之經師人師云先生長身臞貌醇靜寡慾動止咸有常則與人交無少長率恂恂善下卑以自牧雖甚習不忘恭敬或目爲虛拘或笑爲謙癡勿恤也三上春官弗第卽罷去不謁選人尙書期會輒以老病辭有勸之仕者曰五斗折腰此在古人則然今之牽絲製錦者聲勢煊赫祿入優厚飲不計夫貪泉金何須於暮夜人求之弗得子棄焉如遺此則予之所不解者也況乎退之之窮難送孝先之嘲可虞

總不爲臆仕謀亦當爲寒毳慮也而何不翻然改
圖褰裳就之哉先生笑應之曰予賦性迂拙無應
世之才乏逢時之技且頻年善病不離藥爨百里
非堪四知可遽而敢以誤國誤民者兼自誤耶其
樂天知命潛於榮利如此予初識先生於城西李
氏嗣是屢親色笑則於南村之一畝園把臂入林
論文樽酒兩人交相善也迄今廿載有如一日雖
各緣衰老不能數數相見而淡如之交君子以之
固無嫌也獨是感念平生低徊往事時勢遞遷盛
衰倏易當年朋舊強半已悲宿草而予與先生尙

得歸然無恙對首宿之盤桓靈餘之簡相與婆娑
於翰墨之場斯亦幸矣明歲戊午先生年屆七旬
其門人輩於筐篚束帛之外屬艾城李君縑百壽
圖而諸知交復乞予文爲壽予以爲先生之文章
道德固未足繼跡文清諸公而以視今之坐擁皋
比文行俱謬傲然徒以甲乙科爲誇人之具者爲
何如乎故不辭固陋而爲之序至於先生之忠信
孚於閭里孝友著於家虎則遠人有所未悉姑俟
先生之鄉人言之而一切以瑕之浮詞勦說者皆
在所屏却蓋不特予之所不能爲而亦先生之所

不欲聞也先生其可驟然而進一觴耶

董母梁太孺人七旬壽序

代

太孺人爲從祖

公之季女余之從堂姑而合

六董公之繼室也乾隆歲在屠維赤奮若辜月上浣之九日孺人七旬設悅之辰姻族鄉黨夙仰太孺人之賢而羨其康寧而壽考也咸思製錦稱觴先期始之子走京師述姻黨之意乞余言

爲壽余竊有感於梁董二家盛衰之際矣始太孺人以長姊之歿續配合六公時家門鼎盛公

與先

公皆在堂伯氏以部郎出守永平而余

亦舉於鄉合六公則以閭閻佳公子蜚聲黌序間
後遂循例授鎮南幕官人皆以太孺人從容安樂
處之裕如然太孺人弗敢順適也進事君姑得其
歡心以孝稱撫長姊遺息不異已出以慈稱隨夫
遠宦益修內職俾得專心王事且慎稱甘脆
之味華綺之飾屏而弗御以親世之安翟茀之榮
而忘井臼之勞者殆有間矣厥後 公先

公與余伯氏相繼凋謝余亦瓠落不偶而合六公
以年至返初服不數年遂捐館舍家益中落兩姓
皆不免風雨飄搖之患而太孺人獨能撐柱門戶

淡泊自甘內治井井咸可爲法古所稱東海京陵
則範鍾郝何多讓焉於是宗黨中愈嘖嘖稱嘆而
太孺人之賢益著迄於今余遭際 聖明忝以經
學猥蒙薦舉歷官司成而太孺人諸子皆守合六
公家法底於成立孫枝競爽繩繩振振且有筮仕
者矣此亦吾兩家由剝而復之漸乎太孺人一身
備歷其境由盛而衰衰而再盛而又康寧壽考神
明不衰其邀天之眷而食後嗣之報者寧有旣耶
姻黨之壽之也固宜余久官 京朝去鄉邑者已
二十餘載凡內外族黨問遺慶卹之數恒不能悉

方深用歉仄而今乃得執筆而爲太孺人祝嘏之辭故不敢以浮游之說進而敬述余之所感於兩家者爲太孺人侑一酬焉

郭母文孺人七十壽序

代

古者間必有史所以勸善也而女子之德亦必有女史書之故周南一十一篇言女德者十召南一十四篇言女德者九至於禮有內則易有家人無不諄諄言之然多言夫饁醢聲悅之常而未究夫盤根錯節之變世之寡聞淺見者遂若以巾幘中之操行終不鬚眉若也豈通論哉此余於郭母文

孺人有深慨焉孺人系出路公爲介望族幼嫻母
教年十六歸於郭七年而寡一子甫二歲是時郭
門嗣續寄於一綫危如累卵數年之內君舅復歿
家步孔艱百苦叢集有風雨飄搖之患無期功強
近之親孺人以一身支柱其間上事孀姑下撫孤
幼婦備子職母兼父道自冠婚喪祭以至米鹽細
碎薪水凌雜無不黽勉有無雖甚勤劬而事無弗
辦卒之教子成立事君姑者逾三十載由困而亨
愷郭氏於磐石之安其苦節淑行殆媲美古媛矣
夫三代而後婦道廢缺禮法弗講栢舟之咏黃鶴

之歌世家巨闢且不多觀矧窮檐荆布之迫於艱
難困苦者乎若孺人者不可謂難歟庚寅歲邑侯
山陰王公採輿論以孺人節孝載之邑乘垂之永
久爲來者勸人咸以爲允云令子書升策名成均
品行醇謹聲譽翕然諸孫蘭茁繞膝含飴並稱偉
器是可知孺人之福壽自天佑之而其食報於子
孫者正未艾也今歲壬子夏五廿七日其七十設
悅之辰也牟麥登場熏風入座萊衣獻綵榴燈紅
巾蠟鳳邀歡荷擎翠蓋延齡之酒旣清且醇早熟
之桃亦甘而碩子拜於前孫拜於後而鄉里族黨

亦皆旅進登堂以效岡陵之祝其亦可以爲榮也已雖然余謂此猶未足爲孺人羨也安不忘危存不忘亡植少君訓孺人固習聞之矣回憶數十年含冰茹蘗蓬戶繩樞鐸燈夜作寡婦孤兒相依爲命有不黯然神傷者乎余願爲之子若孫者慎無忘此日也則凡所以承天之佑而思報稱夫孺人者當更有進也他日登巍科躋顯仕朝廷有翰軒之使孺人之節孝壽考當必播之風詩達之天聽綽楔旌門翟弗被服鸞書焜耀於庭列女紀載於史將並於孺人一人見之余舊史官也今又

泰掌綸誥固可橐筆以俟矣詩曰彤管有煒孺人其具足昭我彤管者歟故於邑人之請不辭而先以此序爲之端也他若瑤池閭苑鶴算松齡一切祝嘏荒謬之詞皆在所屏却孺人覽之或可驟然而進一觴曰此非老生常談也

侯母李孺人六十壽序

余初娶於合河白氏再娶於同里侯氏外舅鎬軒先生治家嚴肅以故閨閣之內悉嫻禮法而先生仲子婦李孺人則更以節稱李爲介右族來歸時兩姓家門鼎盛禮儀華縟百兩蕭雖一時賀客墻

進而新婦之賢淑亦復播在人口於是親黨中贊者羨者卜其宜家室而綿瓜瓞者率無異辭詎意年僅廿四而寡寡且無子惟二幼女相依爲命而又年皆不永於是向之贊羨者轉而撫膺嘆惜以爲其命之不猶也然孺人之遇彌窮而孺人之志彌勵一節自矢之死靡他卒請於君舅以兄公之次子爲嗣且撫愛逾於所生教之成立爲邑庠生迨君舅歿家益中落析簪後蓬居菑食襁抱諸孫躬親操作有窮嫠里婦所不堪者而孺人安之若素嗟乎席萃廕而不驕處貧約而弗怨士君子且

以爲難而乃於巾幘中觀之可不謂賢歟夫自內
則廢缺女德弗備栢舟之詠黃鵠之歌邈焉無聞
以爲今之不逮於古也第予考之詩其以節著者
止一共姜而已稽之春秋其以節書者止一紀伯
姬而已而後世邑乘之所載綽楔之所旌乃往往
不乏是又古之不逮於今也蓋詩采風也苟不播
之歌咏則無從采而存之春秋紀事也苟不以之
赴告則無從得而書之昭代教化覃敷崇獎節
義世家巨闕固以守貞爲足重而窮檐荆布亦以
失節爲可羞貞姬烈女有司率得以其事上聞

則今之勝古不亦宜乎雖其間或事迫於父兄或情牽於兒女或貪擁夫厚貲或懼誤於非偶或痛激於一時或悔萌於後日勉強徼倖以完全其名節者亦間有之而善善從長論者不苛也如孺人之毫無瞻顧百折不回含冰茹蘖歷數十年如一日者斯誠可與古賢媛爭烈矣今歲丁巳孺人齒屆六旬守節逾三十載與國家建坊崇祀之典符願以力有未能姑俟後舉而先請之學使者題匾以旌焉於是向之贊羨者嘆惜者又轉而欽其苦節之貞白首不渝而微言於予予老且慙學植

荒落其何能爲孺人壽獨思由泰而否天道也由剝而復亦天道也天之報施爲善與爲不善亦間有出於儒生意料之外者而獨於貞節之婦必有以報之於其身於其子孫則孺人後此之福壽康寧固可操券而得也是可爲孺人壽矣況其守貞不二之操始終顛末皆予身親見之故不辭而爲之序

羅母董安人七十壽序

代

嘗博觀古載籍紀婦人之行者亦甚夥矣惟劉向所撰列女傳八篇標其目曰母儀曰賢明曰仁智

曰貞順曰節義曰通辯曰華箋以爲勸誠傳頌皆
與雅可喜後之以列女名書者皆祖之而其文與
事卒遜焉蓋自內則廢缺女德弗備以古証今其
不逮於古也固宜然封鮒之母挽鹿之妻辛敞之
姊狄相之娵饒娥之孝呂榮之貞隔紗講學之宣
文步幃解圍之道蘊先姊而行之巧辯所乏惟容
之諷言亦往往不絕於世又安見漢唐以下之釵
笄必不逮夫周秦以上之閨閣哉羅母董安人州
佐遠猷公之德配太學生光泗君之壽母也其毓
德於董也淑慎寡言嫻習女紅以賢女稱其來歸

於羅也善事君舅君姑久而彌虔與州佐公白首相莊有鷄鳴戒旦之風以賢婦稱其撫子女也雖恩深顧復而使之率稟禮法不流於姑息以賢母稱至於富而不驕儉而不嗇樛木流慈施與不倦與物無忤御下以寬其賢行固未能更僕數也然吾謂安人之不可及者猶不僅此也州佐公在日以安人子出嗣族中簪室魏孺人造一子甫二歲是時也羅氏之嗣續寄於屏弱亦幾危於累卵矣而安人鞠養備至愛踰所生厥後夫亡姑歿所生之一子三女皆不永年閨者咸爲悼嘆謂天之報

施善人有或爽也而安人義命自安不以艱危改
度不以憂戚傷生卒能堵柱門戶扶持幼子以免
風雨漂搖之患迄今年屆七旬神明益茂猶稱家
督諸女遺雛尙時時顧恤之苟非有卓識定力深
明夫始終盛衰之理者其曷能臻此此在鬚眉中
亦罕矣況中惻哉殆可與子政所傳之古列女爭
烈矣今歲戊午三月十一日安人設輓之辰也子
光泗感母氏之劬勞思有以慰藉之而族黨親舊
亦並擬製錦稱壽以序言屬余余長子元配爲安
人第三女固稔知安人之賢不敢以弁陋辭因掇

其閭德之大略而爲之序

容叅文鈔卷三

綿上茹綸常文靜

墓誌銘

中憲大夫雲南普洱府知府高公墓誌銘
中憲大夫知普洱府事高公既卒之三年葬有日
矣其孤以公弟守備公所撰事略來請銘余與高
氏爲姻好而公之配李又先府君中表女弟也不
敢以不文辭乃序而銘之公姓高氏諱光祖字命
新別字寬軒先世本秦人遷介休上站村最後移
居城中高祖友奉曾祖世明祖文英太學生贈奉

政大夫考習詩太學生候選縣丞封奉政大夫晉
贈中憲大夫雲南普洱府知府生三子公其長也
幼慧讀書多殊解端肅如成人有至性年甫舞象
母劉恭人歿哀毀成疾幾至不起事繼母陳恭人
以孝稱年逾弱冠遭世父喪復擢夙疾中憲公恐
其以文字嘔心乃使之歷練武事年二十七入武
庠冠其軍五赴鄉試不售遂以中憲公之命入都
援例授府同知比歸中憲公已邁疾公日夜侍醫
藥凡五閱月既歿哀毀視劉恭人殯甚病骨支牀
半載始有起色其瀕於死而獲生人咸謂天有以

鑒公之孝也已巳服闋謁選人揀發貴州都勻府
八寨理苗同知庚午署定番州兼攝都江通判辛
未署理都勻府篆壬申署銅仁府兼松桃同知乙
亥用大憲薦赴部引見便道省陳恭人於里第丙
子題署南龍府丁丑七月 特旨授雲南普洱府
知府甫三月以南龍所屬之普安縣交代未清案
內罣誤歸十年卒年六十有二公之署都勻也時
適遇旱公禱雨立應又時戒諭土司謂八寨之苗
易擾而難安凡有差役務令均其勞苦給以鹽米
雖菱蕩之需悉照時值其在銅仁松桃之紅苗最

宛悍號爲難治公蒞任發其奸懲其橫勸其力田
每月逢五之日爲宣講 聖諭凡苗有訟卽於本
地判理以示不擾不妨農也南龍漢苗雜處風俗
頗敝凡有冤抑多泊於利鮮申訴者公以事過安
南夜有女子跪於帳外叱問之忽不見詢之館人
蓋邑中有女子無賴犯之不從遂殺之令求殺人
者不得已數月矣公面諭邑宰曰朝廷設官理民
枉也今宛徒漏網貞女銜冤我曹當愧死矣回署
卽禱於城隍神嚴飭差役給路引限以三月後果
於廣西柳州府馬平獲之置於法復請於上憲旌

其女於是南龍諸郡號爲神明其歌頌殆亦如古
之召父杜母云第公雖歷署苗疆要地然卒未得
久於其任故經濟之略十未領一陞任後方期次
第設施而竟以罣誤歸矣公生平廉靜寡欲復多
技藝歸田後足跡不入公府惟日與二三故人聚
首寄情筆墨識者謂公書遠法顏魯公畫近希唐
六如詩古文辭並有體裁晚歲惡城中喧囂以家
事付之二弟居靳凌邨先是公以中憲公命築屋
於茲其曲折低昂悉出已意數載始竣中憲公顏
其堂曰思安蓋取老者安之之意至是始居之承

先志也公生於康熙四十七年七月二十二日卒
於乾隆三十四年正月十三日元配李恭人有婦
德姑陳恭人以黔省路遠不欲就養恭人卽奉以
家居終不隨任也繼梁氏又繼梁氏公無子以猶
子上翊爲嗣女一適郭某卒將以乾隆三十七年
八月十五日葬於南鄉泉兒頭甘草原之新阡銘
曰公之持已廉以潔公之爲政簡以寬無愧於古
之循吏而惜未得久於其官瞻彼山麓廡廡原田
以奠幽壙億萬斯年過者必式曰太守之阡

儒林郎布政司理問張公墓誌銘

公之歿也閱二十八月矣其孤將以乾隆三十八年閏三月初五日塋公於下城南村之新阡以元繼配許段兩安人祔先期乞余銘其壙中之石公之仲子婦余從妹也公之孫筠芳又娶余長女固習知公者不敢以不文辭公姓張氏諱玉珠字寶寰號瑞軒太學生以子職封儒林郎其先本隴西人遠祖諱天祿者始遷汾之介休曾大父士英太學生大父奉恩父俊耀妣梁氏孟氏郭氏孟生二子公其仲也弱歲失恃哀毀如成人事父及繼母存歿靡不以禮與兄尤稱友愛同爨者五十餘年

伯兄素負智略時用計然策遊充豫故家事皆屬之公公養老字幼闔門數十百指皆雍穆井井如也雖亦托跡市闐然恬靜寡欲未嘗孜孜錢刀爲俛拾仰取計性尤長厚不好與物競卽甚習者亦未見其疾言憤色生平勤儉自勵無重綺兼肉博奕玩好之具早興晏息率與寒素埒晚歲雖以家政付之二子猶不改其度人或勸之輒曰吾豈吝此阿堵物而好爲是劬劬哉從來治家之道略通於國其始也莫不肇於勤而盛於儉而其旣也莫不荒於惰而毀於奢吾之所爲凡以杜奢惰之漸

歲感介俗奢靡螫惻慨然興避地之思挈家之鄴
下六閱月旣以事不克如意歸而杜門謝客憔悴
抑鬱遂頽然一寄於酒家人輩有以止酒戒者則
朗誦酒德頌却之然卒以此得疾遂至不起嗚呼
可悲也已君修潔自好內行純備非素稱名飲者
中歲以往始遺棄世故沉湎自溺一如竹林諸賢
之爲其殆有托而逃焉者耶嗚呼以君之綜鍊庶
務使之作郡則循吏以君之好賢惡不肖使之立
朝則賢輔而僅以例授州佐且終不及一試顧領
沒世年甫逾艾以死此太史公所致疑於天道是

非者也寧不重可悲哉君生於康熙五十二年四月十四日卒於乾隆二十七年十二月二十日得年五十有二元配任氏繼配李氏皆贈安人又繼侯氏王氏楊氏側室武氏子男子五長經常武庠生任出次綱常太學生次繼標侯出次元常王出次季常武出子女子三任出者二卒出者一俱適名族孫男三攀龍夢周夢白孫女三將以乾隆三十四年三月二日葬於縣西內封卹祖阡之次銘曰

咏懷阮藉頌酒劉伶衆醒而醉君醉而醒於古位

置爲後典型不愧不忤存順歿寧千秋萬歲莫此

幽扁

季父歿後諸兄弟寓書於外舅白素菴先生求
爲誌銘時先生方宦蜀中未暇筆墨間以委不
肖因揮涕爲此故詞無溢美焉未知先生他日
視之以爲何如耶乾隆丁酉仲冬錄此附識

朝議大夫張公墓誌銘

代

昔太史公謂淵深而魚生之山深而獸往之人富
而仁義附焉然世之擁贊自雄者華居美服或梯
榮仕宦或邀譽交遊甚者且驕誕縱恣徵歌選伎
馳逐於狹邪博塞之場以招尤斂怨破其產者比
比然也求其處豐若歉恂恂善下敦孝友飭言行

歟公諱煒字杲如光字其別號也先世自隴西遷
介休曾祖奇士 覃恩貤贈中憲大夫兵部武庫
司郎中加四級祖龍瀛 覃恩貤贈奉政大夫兵
部武庫司郎中父呈錦 勅封儒林郎布政司理
問母高氏封安人生二子公其長也少聰穎讀書
能通大義恬靜寡欲矩度如成人年十六儒林公
遭狂疾遂支柱門戶稱家督一切生產貨殖之繁
居室米鹽之細靡不井井有法處之裕如尤工計
然策門下授貲行賈者常數十輩悉聽公指焉侍

儒林公疾最久凡飲食醫藥悉親任之歷數十年
如一日高安人壽登大耋公年已卽遲暮而色養
不衰皆人所難厥後喪塋一準於禮與弟理問公
友愛無間至於祭必以誠寬能容衆勤古誼嚴義
方其內行純備如此生平自奉儉約略如寒素室
無姬媵篋無玩好與人交若不能言者然通達大
體如金川軍餉暨城工醴務皆能捐貲重貲不吝
晚歲杜門簡出偶過里中雖賤夫幼豎亦跋跋然
與爲禮稍聞謔競聲輒趨避去以故人尤稱公長
者云迄今諸子姓彬彬淳篤絕無浮侈之習蜚聲

藝苑待詔金門鵬搏鵲起方興未艾公之貽謀不
亦善且遠哉公太學生以輸餉准軍功叙用主簿
以城工議叙得官日加一級以子金棡援例 贈
朝議大夫布政使司理問加四級以康熙四十四
年七月二十七日生以乾隆三十七年四月二十
二日卒年六十有八配李恭人處士龍育公女有
賢行相夫子以勤其家事君舅君姑以孝稱後公
十一年而歿年七十有七子二人長卽金棡朝議
大夫布政使司理問加四級次企載後選州同知
卒女三人俱適士族先卒者二孫男三人清典侯

選員外郎清化廩貢生卽用中書科中書企栻出
清政附貢生卽用中書科中書企載出孫女三人
曾孫男六人應升應泰應恒應鼎應豫應豐曾孫
女六人乾隆五十年正月二十日嗣君企栻等將
奉公柩葬於上城南村新塋以李恭人祔先期遣
其猶子清政來京師乞銘余於公爲同里後進余
配又公外孫女也固稔知公者不敢以不文辭因
按狀誌而銘之銘曰

惟慎無憂惟忍無辱惟靜長安惟儉長足于門之
大於焉可卜汾水之陽綿山之麓永奠幽宮以歆

芳躅

文學王田夫先生墓誌銘

三晉文學之士唐以前稱最盛焉宋金元明以來
惟元遺山雄視海內爲詩家大宗 國朝定鼎教
化覃敷人文蔚起如衛文清陳文貞吳文端魏敏
果田文端諸鉅公太原傅青主趙懿侯閻百詩武
鄉程崑崙太同徐雲門襄陵高蒼巖代州馮訥生
蒲州吳蓮洋諸君子皆著名藝苑不愧在哲獨汾
介間自梁深山先生始崛起騷壇與當代名流通
綺紵厥後風雅日上綿上四山人其尤著者也四

山人者董刺史帷園梁太學秋谷任文學西郊其一
一卽田夫王先生也先生諱佑字天孚一字石樞
又字田夫系出周靈王太子晉後世爲汾之介休
人明洪武中有諱傑者仕爲富平令歿祀名宦數
傳至先生曾祖內堯爲諸生食餼有聲祖進賢以
醫名當世父文輝太學生敦尚氣節博學能詩著
述甚富爲邑名宿尤精岐黃術生三子先生其長
也少穎異勝衣就傳矩度如成人年甫弱冠補博
士弟子與同學任君西郊讀書城西禪院繼又下
帷孤岐山之自得菴與梁韭園孝廉秋谷西郊爲

講習經史之會攻苦不輟然不好爲場屋之文每
肆力於詩古文辭凡古近名家專集以及山經地
志農圃醫卜浮屠老氏之書無不博覽強記而尤
耽於吟咏旣屢躋棘闈遂棄舉子業遠遊巴蜀探
峨眉下三峽之金陵泛秦淮入幽燕登郭隗之高
臺訪張華之故宅優爲詩歌沉雄瑰麗蓋有得於
江山之助與夫通儒勝士之切劘者深矣倦遊歸
托跡衡門倩雲間陸遊萬寫述禪圖以寄意蒔花
藝藥陶然自足望重河朔問閭理先業以醫濟世
遠近耳先生名率不敢以技術相待故載酒雲亭

從遊蔣徑與造請醫藥者戶外恒屢滿也歲己未
與汜湖王冰若刺史臨縣王鳴池孝廉同里張雍
圃進士暨其子蘭谷叅軍羅景陸明經張樹赤茂
才惟園秋谷爲味外詩社甲申復偕惟園西郊蘭
谷汾陽魏書巢進士及予爲樂與詩社每當譙集
高談雄辯分題角咏狎主敦槃一時同輩咸斂手
下之第剛方負氣矜慎許可遇俗子譏文章者輒
置不荅甚且面折之人亦以是嚴憚焉予嘗謂先
生詩上溯魏晉旁參蘇陸而神韻音律一以三唐
爲準古風長律尤推擅場少日訪深山先生於白

登山下得句云風吹千樹夕日落半山陰識者早
卜其遠到吳門楊文叔先生摘其警句五古如虎
踞長城界貌奔桑乾水揚鞭策馬過却疑山亦駛
舉手摘飛星低頭看飛鳥江水一泓碧吳山幾點
小七古如霜蹄踣地寂無聲萬壑千巖影乍滅近
體如玉鈞簾外子規啼背人孤雁入寒雲謂爲古
名人集中流傳佳句信不虛也桐城劉君大櫪序
先生詩稱其巧而不鑿嚴而不淫藹而深淡灑而
和平人以爲知言他如仁和沈松阜魏塘曹慈山
會稽吳櫟庭皆世號能詩者共推許無異詞是可

以知先生之詩之工也已先生生有至性才識沉
毅重然諾嚴取予事親先意承志備極色養相繼
丁內外艱哀毀骨立百日之中惟啜粥一盂而已
三年不飲酒不茹葷自初喪及塋罔弗如禮與兩
弟友愛無間析箸後分多潤寡體恤周至其克敦
孝友如此晚歲邑侯王公重先生學行延與西郊
及予預修邑乘乃秉筆者仍候幕中人非先生意
也嗚呼以先生之才具通明學問淹博使得置身
石渠天祿之間其著作必更有可觀而卒終老林
廬僅以詩自鳴於世豈不惜哉然先生不朽之業

惟托於詩故不厭詳言之而其他事略見云先生
生以康熙四十一年八月二十八日卒以乾隆三
十五年閏五月初八日年六十有九所著有嗜古
山房文抄擬古草堂詩抄暑中唱和集病榻吟卦
山雜咏古香詞若干卷藏於家其詩見於四山人
集中者惟園梓行之非全集也配任氏繼魯氏又
繼李氏側室尹氏劉氏尹氏先卒劉後先生十四
年卒子男三國豫劉出國青曾出國充李出後先
生十一年卒女四一適太學生候選從九品董仲
贍尹出一適府庠生梁人驥劉出一適太學生宋

嶠曾出一適岳現書劉出國豫等將以乾隆四十
九年十月初八日塋先生於西靳屯青龍畛祖塋
而以四孺人附先期乞銘於予曰不孝等聞之不
及時而葬謂之渴塋過時而不葬謂之不能塋府
君之塋過時矣然以不孝等孤幼弗克負荷塋事
今雖稍長而又不能記憶府君行事所撰事略十
得二三耳府君文字之交存者惟先生耳固習知
府君者幸憐而教之予聞其言惘乎心悲回憶曩
時辱與先生暨帷園西郊爲忘年交樽酒論文素
心晨夕固已邈不可得屈指社中六人獨予尙在

而亦年逾知命髮種種矣惟園之歿予爲行狀西
郊銘之今西郊亦悲宿草銘先生者將更屬之何
人予安忍以荒陋却諸孤之請而負知己於冥冥
之中哉因按狀並掇拾舊所聞見序而銘之銘曰
先生之貌頎而頰鬚眉偉然音響宏其學深邃如
淵渟接武前修以詩鳴沾溉後進垂典型冰雪襟
懷古性情抑復慢世同長卿松楸此日悲幽局干
秋應留不朽名

登仕佐郎翰林院待詔鄉飲大賓侯公墓

誌銘

外舅鎬軒先生之七旬初度也鄉里乞余言爲先生壽越六年而先生歿又一年而其孤乞余銘其壙中之石嗚呼曾歲月之幾何而孰意爲先生壽者竟復爲先生銘耶豈不重可悲哉先生姓侯氏諱國新字郁西別字鎬軒世爲汾之介休人曾祖尙綱武生祖奏職府庠生父廷儀廩貢生候選教諭以先生貴 貤贈登仕佐郎翰林待詔兩世率有聲黌序皆年未及艾而歿爲士林所悼惜先生少失怙哀毀如成人事母梁孺人以孝稱雍正壬子梁孺人歿哀毀彌甚喪塋靡弗如禮撫幼妹尤

恩禮周至讀書通大義凡外侮內訌處之裕如綜理家政井井有法下至綦屨皆得其所識者早有以覘其器識之遠大矣年未及壯風裁整峻言笑不苟望而知爲端人偉士癸亥遊京師以例授翰林待詔乙丑以應得封典贈父母蓋先生固有志用世而以終鮮兄弟獨力支柱門戶未能如意自都門歸每倘佯綿山汾水間探奇選勝間或彈棋撥阮以消其磊砢故一時賢豪長者咸樂與敦僑札之誼長吏下車亦多折節諮訪金川之役先生家僅中貲首以千金助餉他若捐貲學宮輸

穀義倉其慷慨好施率此類也至於享祭以誠飭
躬惟敬閒室之內嚴若朝典訓諸子姓殆有類於
漢石奮萬石君家法焉晚歲與邑中士大夫爲耆
年會雖稍近和易而少年恣縱者猶憚近之戊戌
舉鄉飲大賓踰年以子瑋遇 覃恩賜封登仕佐
郎嗚呼鍾清剛之氣負綜覈之才倘得進而見用
於世則發爲功名達爲政事必更有可觀者而奈
何使終老於牖下哉先生長身廣顙耽書嗜弈熟
悉古今成敗每當文酒之會叙述邑中諸前輩嘉
言懿行與夫故家遺俗呢呢不倦使後生晚進得

聞緒論奉爲矜式余以爲獨賴有先生在也迨先生歿而老成云亡風流頓盡真有山頽木壞之感已被以負性揮霍扭於席豐履盛之常不能爲俯拾仰取計而致家道中落爲先生病者此亦管窺蠡測之見也夫先生生於康熙五十年六月二十一日卒於乾隆五十一年閏七月初四日壽七十有六以五十二年九月十二日葬於先塋之次以元繼配梁任燕三孀人補子男十國長琪貢生娶梁氏梁出次玥娶李氏卒次璿山東蒙陰縣典史娶董氏繼李氏任出次瑀娶王氏燕出女子一卽

余繼配卒任出孫男六珙出者二鎮冀太學生娶
石氏鎮青武生娶馮氏繼李氏又繼李氏出嗣珙
珙出者四鎮冀太學生娶溫氏繼李氏鎮豫娶石
氏繼郭氏鎮冀太學生娶宋聘孫女八珙出者四
長適太學生長適梁安仁次適太學生梁
處仁次適侯選主事張敦培珙出者二長聘郭慎
徽卒次適郭慎徽卒珙出者一適張於峻珙出者
一幼未聘曾孫男一曾孫女二俱鎮冀出銘曰
先生之德性清剛先生之品望珪璋先生之貽謀
無錫臭而有書香彼汾一曲綿山陽幽宮鞏固後

世昌

太學生任君墓誌銘

君任姓諱拔字超凡號怡園世居介邑之龍頭村
君始徙居城北翼曾祖奉正祖先知父文英太學
生子二長掄次君也年未舞象失怙哀痛踴踊
如成人越十年母郭孺人復以勞瘁避疾時伯兄
方用計然策遠遊君獨恃湯藥每廢寢食及殲毀
瘡彌甚幾至滅性祖雖無病如禮君少有志略性
豪邁重然諾喜施予讀詩賦大意適尤好臨池帖
碑之餘卽摹數鐘三書帖不覺精爽血虛遂不克

竟舉子業援例爲國子生與伯兄友愛無間言雖
析箸後各挾貲經營走四方而省暮歸休歲時伏
臘風雨對床猶怡怡如昨也第君兄弟皆艱於嗣
續君一子而伯兄五旬外始舉一子以故君每以
爲憂而憂兄之念更切於已君之居心勵行率類
此嗚呼君之才具明敏器識鴻通使之見用於世
其所樹立必不止此而僅僅出陶朱公之緒餘以
自見豈君之志也夫雖然家累千金鄉里稱善人
傳之子孫垂諸永久斯亦足矣以視夫朱閭丹轂
財勢烜赫不旋踵而蕩爲冷煙蔓草者爲何如哉

此予於君不禁有深慨焉君生於康熙五十五年三月初四日卒於乾隆四十一年正月初七日年六十有一配郭孺人元慶公女有壺德少公二歲先君十一年而歿妾崔氏孟氏崔亦前卒子一應陞太學生娶侯氏繼梁氏李氏女二一適太學生張允恭一適貢生岳現增俱郭出孫男二長衡次凱尙幼孫女四一卽予三男景歐婦也卒一殤一適李成霖一字王榮祖其孤將以乾隆五十六年四月初六日塋君與郭孺人於遐壁村之新塋前期乞予銘其壙中之石曰先考妣之卽世也遠廿

餘歲近亦十餘歲不孝不克塋之罪百喙莫辭矣
祇以墳域未卜門族單微復遭先伯父之喪期功
無強近之親里黨少將伯之助淹遲至今幸而獲
購新阡伯父之幼子亦已成立惟先府君之行事
恐久而湮沒不彰則不孝之罪滋大故敢以累吾
子予忝附親誼固稔知君者不敢以荒陋辭爰誌
而銘之銘曰

梁棟瓊材琮璜茂器歛照韜精不及一試渤海襟
期邱國風誼逐末居奇聊爾寄意惟孝友子慈祥
愷悌德紹前修澤被後裔雖云一夔家聲罔墜綿

山蒼蒼兮水泚泚
叶吉牛眠佳城永闕
銘君之藏以貽百世